

AKHBAR : BERITA HARIAN  
TARIKH : 09 DISEMBER 2023  
SENTIMEN : POSITIF

MUKA SURAT : ONLINE  
HARI : SABTU



BERITA SUKAN DUNIA HIBURAN BISNES RENCANA WANITA HUJUNG MINGGU BH KAPSUL BELANJAWAN 2024

NASIONAL KES POLITIK PENDIDIKAN WILAYAH

## PTPTN jangka pemberian dividen Simpan SSPN meningkat

Oleh Mohd Nasaruddin Parzi - Disember 9, 2023 @ 12:01pm  
bhnews@bh.com.my



Pengerusi PTPTN, Datuk Norliza Abdul Rahim. - Foto fail NSTP

KUALA LUMPUR: Perbadanan Tabung Pendidikan Tinggi Nasional (PTPTN) menjangkakan pemberian kadar dividen Simpan SSPN bagi 2023 akan meningkat berbanding tahun lalu.

Pengerusi PTPTN, Datuk Norliza Abdul Rahim, berkata jangkauan itu selepas melihat kepada peningkatan keuntungan pelaburan dan trend prestasi deposit Simpan SSPN yang membanggakan setiap tahun serta disokong pelbagai keistimewaan dan manfaat Simpan SSPN yang ditawarkan.

Katanya, PTPTN sudah merekod pulangan pelaburan deposit Simpan SSPN sebanyak RM287.64 juta bagi tempoh Januari sehingga September 2023, sekali gus menyaksikan pencapaian hasil pelaburan yang lebih baik berbanding RM220.63 juta bagi tempoh sama tahun lalu.

"Peningkatan Kadar Dasar Semalaman (OPR) kepada tiga peratus pada 3 Mei 2023, sehingga kini membantu PTPTN memperolehi pulangan pelaburan yang lebih konsisten.

"Peningkatan keuntungan ini disokong oleh kaedah pelaburan patuh syariah berjangka pendek dan panjang di pasaran wang tempatan yang melindungi prinsipal, di samping memberikan pulangan yang tinggi dan positif.

"Pemantapan strategi pelaburan dengan menumpukan kepada simpanan tetap jangka panjang sudah berjaya meningkatkan pulangan pelaburan," katanya dalam kenyataan hari ini.

Di samping itu, katanya penglibatan pelaburan dalam pasaran sukuk juga membantu dalam peningkatan pulangan pelaburan, selaras dengan hasrat kerajaan untuk memastikan simpanan dalam Simpan SSPN sentiasa terjamin dan dilindungi.

Justeru, beliau menyeru ibu bapa membuat simpanan di Simpan SSPN kerana pelbagai keistimewaan dan manfaat turut dinikmati pendeposit, antaranya ia satu-satunya produk simpanan yang menawarkan pelepasan taksiran cukai pendapatan ke atas simpanan bersih sehingga RM8,000 setahun.

"Selain turut memberikan perlindungan takaful ke atas pendeposit, Geran Sepadan sehingga RM10,000 untuk satu keluarga yang layak, simpanan yang dijamin kerajaan dan patuh syariah," katanya.

PTPTN kata beliau, akan terus komited untuk meningkatkan kesedaran masyarakat agar terus menabung di dalam Simpan SSPN bagi mengelakkan kebergantungan kepada pinjaman.

"PTPTN yakin usaha ini akan disokong oleh semua pihak bagi merealisasikan visi PTPTN sebagai 'Peneraju Tabung Pendidikan Tinggi Negara'," katanya.

<https://www.bharian.com.my/berita/nasional/2023/12/1186970/ptptn-jangka-pemberian-dividen-simpan-sspn-meningkat>